

湧

幢

小

品

湧幢小品目錄卷之十二

兵制

京營

清軍

家丁

民壯

二則

土兵

調兵

二則

背水陣

多多益善

詞林談兵

塘報

三軍

士戲

敗將弛法

射禮三不入

兵器

四則

火器

四則

陣法戰法

步騎射

僧慧開弓

紙鎧綿甲

二則

甲冑審法

廷杖

三則

族刑

木丸塞口

申文鬼殺

伏氣

革鞭夾錢

刑人而笑

鸚鵡墮地

神斷

五則

增官壽

少年編發

非法用刑

門客義男

神示忸怩

雪冤解獄

馮小二

同宗二獄

斷朱英

嗚咽聲

支解不孝子

二主事得罪

爭田

寢大獄

鬼撓搏額

雪白 二則

湧幢小品卷之十二

湖上朱國禎輯

兵制

神農以石爲兵黃帝以木爲兵蚩尤以銅鐵爲兵
揮於作弓夷牟作矢湯築五庫藏五兵秦孝公以
戰獲首功多寡授爵秦二世發閭左民戍邊漢惠
帝令戍卒歲更武帝置八校尉五屬國宣帝募伙
飛射士初置屯衛屯田後魏作府兵後周置十二
衛兵隋置軍器監始募民爲驍果唐玄宗募兵宿

衛募丁壯實邊昭宣帝文民面爲軍五代晉籍鄉
兵 國初立大都督府洪武十三年分中左右前
後五都督府而衛所則立于元年有京衛外衛之
分親軍十二衛不在京衛之列中都河南山東大
寧有入衛班軍 文皇就中摘出北征分爲五軍
歸則團操號曰京營大率五千六百人爲一衛一
千一百二十人爲一千戶所一百二十人爲一百
戶所其官增設無定員召募始于正統己巳踵于
嘉靖庚戌征倭處州兵河南毛葫蘆山東搶手皆

募兵也兩廣用土兵洪武初已然後四川雲貴亦如之在制馭何如大征居其十八

京營

徐文貞謂京營兵世世有月糧暇時又營生事不調從征平時郊祭上陵拱衛車駕軍容甚盛當開操時如法訓練萬一如庚戌有警登埤自不乏人正不必責之臨陣此如大家世族多義孫一旦呼之可壯顏色若邊陲如戚將軍練薊兵勝略固自有在此言切中京營膏腴若欲練以從戎

捍敵是以小兒夜半格大盜其安能抗人家禦盜
不別尋壯丁而責叅僕與二三童子日討而訓之
何益

清軍

余年十四五爲隆慶庚午辛未間見清軍御史至
搜剔操切民間騷然每圖甲有克軍一名里長解
去給一帖爲據赴縣掛號御史至據號徵帖先考
心齋府君藏其二先祖月溪府君忘之久矣諸甲
長都忘失無存者比御史至莫不皇懼先府君以

帖上乃得免先祖喜若更生其餘死捶楚者無算
後見楊襄毅公集以邊患需防一御史主此說行
之二年無所得遂罷後讀楊文貞公傳條陳清軍
一件謂南北不相習以極北往極南極南往極北
是驅之死因引祖制除逃軍仍舊其餘軍丁各就
近衛服役因會議今後清出山東山西河南陝西
北直隸軍丁皆發甘肅寧夏延安大同宣府遼東
諸處雲貴兩廣四川湖廣江福浙江南直隸皆發
附近省分及邊海衛待補足其缺填腹裏之缺允

之天下稱便余謂今之犯罪遣戍者亦只發之本
府縣相近衛所使武弁拘管屯田則惡人束手受
制流官軍職皆得治之又免僉解纏累之苦嘗見
僉解有民壯有里長號曰長解又買軍妻費可百
金而猾者勾吏書經年不行在在索詐弊不可言
且原有妻者索直另買到彼處掛號食糧遞歸則
糧係彼處冒支公私皆受損可惜可惜

家丁

唐劉約自天平徙宣武暴死家僮五百無所仰衣

食思亂盧鈞撫之乃定此家僮卽家丁也隋張須陀有羅士信王君龜有李左車善戰乃家丁所自始

民壯

民壯之設介在軍民間最爲得用 國朝盛于王陽明在宋謂之白芳子

弘治間令州縣選民壯先是天順初令召募民壯鞍馬器械悉從官給本戶有糧與免五石仍免戶丁二丁以資供給如有事故不許勾丁至是令州

縣選取年二十以上五十以下精壯之人州縣七八百里者每里僉二名五百里者每里僉三名三百里者每里四名一百里以上者每里五名春夏秋每月操二次至冬操二歇三遇警調集官給行糧

土兵

其法起於宋所謂陝西義勇刺爲兵者是也然唐藩鎮與漢郡國所用獨非此類乎國初胡深在縉雲當元末盜起慨然謂其友人曰軍旅錢糧皆

民出也而今日之民其困已甚遂請于上令有田者米十石出一人爲兵而就食之以一郡計之米二十萬石當得精兵二萬人軍無遠戍之勞官無養兵之費而二十萬之糧固在也行之數年使所在兵強而財阜此制最善然胡元法度寬縱又當擾攘時故可行且不獨深有此言章濂父子兄弟固已親行之矣成化二年用陝西撫臣盧祥之言選民丁之壯者編成什伍號爲土兵原僉民壯亦入其中量加優恤凡得二萬人時毛里孩方彊盛

卷之二
五
窺邊憚之不敢深入 世宗庚戌以後建議欲練
薊卒而不及土兵終無成功王思質以此受禍唐
荆川以此受謫今邊方有事處處搖動未知此制
可行否

調兵

調之說凡二一調邊兵一調土司兵邊兵起於正
德六年流賊猖獗允兵部尚書何鑑之奏調宣府
延綏奇遊兵五千五百至涿州聽總督官調遣尋
益以遼東大同二枝數數追賊敗之事漸平提督

仇鉞言邊軍久勞風土不宜人馬俱病請量留三之一部覆從之延綏軍取道徑還遼東宣大軍過京犒勞後至京上方好武事遂留不遣并保定兵亦召入尋命京軍邊軍互調出入大臣爭之不聽然京軍終不出而四鎮士馬團操大內號外四家其軍馮依威寵人皆畏而避之至上晏駕乃始散歸世宗時虜倣各邊互調而調守薊州者尤多神宗二十年前邊上安堵免調比征寧夏征播征倭悉借邊兵東西萬里騷然煩動矣

土司惟川湖雲貴兩廣有之然止用於本省若隣省未嘗上中原一步也亦流賊時徵入用之有功

嘉靖間南倭北虜無不資之且倚爲重如湖廣土

兵永順爲上

彭翼南

保靖次之

彭蓋臣

其兵甚強近嘗

調三千人後調六千此在官之數也實私加一倍

共一萬二千人其陣法每司立二十四旗頭每旗

一人居前其次三人橫列爲第二重又其次五人

橫列爲三重又其次七人橫列爲第四重又其次

七人橫列爲五重其餘皆置後歡呼助陣如在前

者敗績則第二重居中者進補兩翼亦然勝負以五重爲限若五重而皆敗則餘無望矣每旗一十六人二十四旗共三百八十四人皆精選之兵也其調法初檄所屬照下揀選宜慰籲天祭以白牛牛首置几上銀副之下令曰多士中有敢死衝鋒者收此銀啖此牛勇者報名彙而收之更盟誓而食之卽各旗頭標下十六人是也節制甚嚴止許擊刺不許割首違者與退縮者皆斬故所戰有功但沿途苦剽剽因調來者非止一枝有過得相推

委故也其他若安若岑若奢大約相同餘瑣瑣不足道

土司兵近年官數亦調至萬矣其實彊者亦不甚多乃官則增之以張聲勢而彼亦願增以徼糧餉賞賜本司不足則借之他司又或收集地棍爲助而中國亡命與不得志流落者投之如鶩漸多漸黠漸橫漸不可制而我軍實又益虛此西南之大患也且如號物之數曰萬女直兵滿萬不可敵蓋言精也匪獨女直卽南方號稱僥弱兵滿萬而精

其可敵乎更下一轉語女直精兵滿萬而將非阿骨打等其可勝乎譚者襲口吻而不究實際往往如此

背水陣

兵法曰置之死地而後生人人能言之又必引韓信背水陣以實之是矣却其中有緊要六子讀者全然不講可笑六字者何曰殊死戰不可敗是也此最用兵得力處所謂人之命根屋之棟柱而太史公文章妙處亦在於此若舍此不去著實講究

而徒曰我欲云云卽十萬二十萬置之死地圍而
屠之如羊豕然豈不可憐其又何益再有進焉
水上軍不可敗亦全賴間道赤幟二千人得此一
著方纔收功不然水上軍抵定亦濟得甚事此絕
世神謀閱計出九天潛九淵者所爲而人乃引以
資口角可乎

多多益善

此四字惟韓淮陰自道是實話其曰陛下不過將
十萬猶是君臣間體面話頭奉承幾分而下亟足

之曰天授非人力大意可見蓋帝王與臣下不同
自當別論此後在唐惟李靖至我明惟中山王
可以當此靖知幾能事唐太宗中山聞道能事我
太祖然爲靖易爲中山難其氣象自然有別而靖之
氣象又勝於淮陰所以然者淮陰自是天人然當
秦末焚書之後流落奔走衣食決無學問工夫觀
其自請假王可見靖讀書曉禮義識得真主確有
欄柄而中山王則亘古聖賢豪傑不可得而擬議

讚歎也

夷狄則粘罕伯
顏亦可語此

詞林譚兵

兵家自有一種天才不分文武至詞林譚兵者前則吳中徐元玉有貞精悍多力工天文每言將星在吳深自負不知韓襄毅雍已出世矣謂紫微垣星皆動力主遷都以此蒙詬要之土木之陷業已應之此際所謂毫釐千里固未易辨也然元玉自奇才若委以軍旅之任必能破虜立功惜相左僅一見于治河且有金齒之阨則命限之也嘉靖中王允寧維楨譚之班班時無能用者讀文集想其

氣象要自不凡他如王恂以修撰改大理丞撫貴
州楊鼎以編修兼御史同元玉募兵其方略必自
可觀嘉靖庚戌趙文肅貞吉以論德兼御史資五
萬金勞行營督戰旣還杖謫詞林皆奪氣爭附麗
工青詞求入直無敢言兵者惟近日或練兵或本
兵崛起詹翰中爲衆所仗大足吐氣矣

塘報

今軍情緊急走報者 國初有刻期百戶所後改
曰塘報塘報之取義未解所謂其說亦不著閩馬

勝藝花記云凡花之蚤放者曰堂花堂一曰塘其
取之此與

三軍

三軍者壯男爲一軍壯女爲一軍男女之老弱者
爲一軍壯男待戰壯女負壘發梁輟屋給從使客
無得以助攻備老弱牧牛馬供爨此商鞅之論乃
若春秋之三軍殆不如此蓋皆堪戰而以大臣互
出入分將者

士戲

楚成得臣與晉文公遇曰請與君之士戲戲者兵也三軍之號所云戲下是也若曰以兵相見云耳林堯叟謂得臣輕用民命便解作戲弄之戲學者習而不咎以爲實然夫得臣亦英雄豈有此失真千古不白之冤更令左丘明扼腕無以謝得臣杜征南獨不下一字已得其解矣

敗將弛法

自古敗軍之將必服上刑遼金稍弛其法卽國隨之矣我朝丘國公敗死革爵徙其家于寧

後遣將多以文臣督之卽邊鎮以贊理爲名而事皆歸其掌握故大將亦不敢力戰深入卽敗亦有分責不獨得坐一人矣

射禮三不入

射禮敗軍之將亾國之大夫與爲人後者不得入敗亾之耻莫甚焉不入固宜爲人後者亦如之何故馮文所云賤夫妄爲者也然則宜爲後者當入矣蓋射本觀德德以孝爲先旣爲人後則本生父母不得執三年喪人子之心何安而敢上觀德之

場乎先王蓋以教孝也由是觀之爲人後者當列不幸之科矣馮又曰非大宗非賢非德而後之皆曰妄棄其親而親人爲利幾于夷虜禽獸吁何至若是甚乎其不妄者豈無十之四五乎或者馮公有感之言不可爲據

兵器

旗有五等曰高招 曰角旗 曰門旗

曰督戰麾旗 曰隊旗

纛有二等曰牙纛 曰望纛

盜有二等曰明盜 曰觀盜

牌有四等曰挨牌 曰圓牌 曰藤牌 曰皮牌

斧有四等曰鉞斧 曰鑿斧 曰鐵鞭 曰鐵簡

刀有五等曰腰刀 曰斬馬刀 曰捍刀

曰眉刀 曰鉤刀

鎗有十等曰長鎗 曰線鎗 曰叉鎗 曰看鎗

曰蛇鎗 曰神鎗 曰飛鎗 曰火鎗

曰戟鎗 曰拒馬鎗

鎚有五等曰重 曰臥 曰蒜頭 曰骨朶

曰

棍有五等曰雙頭 曰悶棍 曰脚棍 曰標鉤

曰狼頭棒

弓有二等曰馬 曰步

弩有三等曰斗子 曰諸葛 曰俚弩

石有二等曰飛 曰礮

砲雖名十一等近益增多矣

武藝十八事一弓二弩三鎗四刃五劍六矛七盾
八斧九鉞十戟十一鞭十二簡十三槌十四叉十

五又十六爬頭十七綿繩套索十八白打

白打卽手搏之戲唐莊宗用之賄郡張敬兒仗以立功俗謂之打拳蘇州人曰打手能拉人骨至死死之速遲全在手法可以日月計兼亦用棍棍徒之說殆取諸此

左都督馬芳少爲繼母所虐走出遇虜掠去從俺答飼馬雖小輒能騰躍控御無敢踉蹌又挽弱木爲弓矢每發命中後亡歸隸周太傅尚文幕下充騎隊虜至通州以三百人橫貫其陣分爲二虜大

驚引去累立功至極品蓋嘉靖末一名將也黃酋
嘗請與公約日手搏許之爲壇塞上方廣五百步
各携虎士百人去弓箭兵器散手單恰立壇側公
結束登壇威容若神交手壁立意氣閒暇黃酋望
見震懼不敢上抽炮矢三發而去虜皆退走由此
奪氣不敢窺塞者數年公猿臂壯偉走及奔馬太
傅短小精悍坐而竦身兩足跨坐屋梁以爲常乃
議者謂太傅武藝雖非所長練兵亦有可取蓋阿
分宜之指欲彈治而北方正賴其力又恐搖動軍

漢書卷一百一十五
卷一百一十五
心生他變也至馬公雖始終無異議而末年以郝
吉納降爲非是坐奪職夫武人言戰是本等事乃
以此課去留何耶如此人物若使文臣知兵有方
略者督之捍奴虜如秋風掃落葉可以一空而動
多牽制不盡用可恨

刀兩刃者曰拍刀起于隋關陵

火器

火器起于周官有矢枉矢緊矢利火射枉矢之屬
以變星名能飛且有光也春秋焚成丘焚者樵之

也晉中軍曳柴焚之也魯取齊攻廩丘之郭主人
焚衝焚戰車也楚奔燧象齊縱火牛孫子五火之
變此其最著水戰之火起于赤壁束葦灌脂用以
濟舟魏唐以來火箭射梯巨礮飛石宋曾公亮編
武經有虎蹲旋風之砲疾藜霹靂之毬

國朝火車火傘大二三將軍等銃四眼雙頭九龍三
出鐵棒石槌等器最利者爲佛郎機鳥嘴近又增
火箭火磚而用無可加矣此外則猛火油最烈今
未之聞或云出高麗東數千里日初出處烘石所

融之液侔物遇之卽化爲火唯真琉璃器可貯
陸戰用火莫著于陸遜梯歸之役水戰用火自赤
壁外莫著于我太祖鄱陽之役然皆草木葦荻
之類束而灌脂又趨風勢雖間以毬砲未聞全用
火藥火器也惟建文東昌之戰燕軍爲火器所乘
死者萬餘人味一乘字則戰酣而川非全恃以決
勝也文皇因之有神機銃砲之屬其製始盛五
軍鐵騎恃之益彊能逐虜數千里外至宣皇喜
峯口外之戰先以兩翼飛矢虜不能支而後以此

乘之則用之次第可見自後兵不習戰專倚之爲
護身符敵佯挑戰誘我或驅所擄掠我中國人先
嘗我火器叠發敵叠爲進退藥盡敵衝而前全軍
潰散甚有不見敵而發火敵至不及發而先走者
則火器誤之也

火藥重在提硝潔淨硝有上中下三等上等百斤
提至九十斤次者提至八十斤下者七十斤必鹹
穢去盡春搗極細試然鐵上著火無滓方妙大銃
藥乾結成塊經年不碎雖久冒霧雨放之雄烈遠

去百步入火箭火龍火磚諸器之內雖二三年可用則提之至淨故也不者雖藏之極密吐濕盡廢無用矣

陣法戰法

劉錡王德禦金人于柘皋用萬人持斧如墻而進此陣法之最整者焉榮衆號百萬爾朱榮以八千騎討之分騎爲數處處不過數百人揚塵鼓譟使賊不測多少臨戰不聽斬首以捧捧之而已大破擒之此戰法之最神者然必慣戰久用精兵指揮

如意方可語此近年撫臣有以萬人持刀演爲雪花陣又有以萬人持棍演爲一字陣真同兒戲吾友莊復我督糧莊浪每稱西兵慙勇云百數人遇虜殺盡不肯退用兵者有此站立脚跟方可言陣言戰而喫緊尤在選將將如何選那得有宗汝霖一隻具眼拔出岳鵬舉只于練兵見之看其人骨格堅勁意思深沉木訥有志尚者付以二三百人練成一隊卒而試之果能站定不擾亂益以千人又儘其力量加至三千人便是一枝上好戰兵能

加至萬人卽大將所向無前更得文臣知兵者與之共事而所謂監察巡視者各寬其文法公其舉効何施不可

步騎射

古人之射穿楊命中今天下之大豈無其人而省直武舉騎四矢以上步射二矢以上卽爲中式聞射騎在十步之內卽步射靶子亦不過六十二步苟有妙手與平日習慣中之亦非難事而從來騎未見有中至六七矢步未有四五矢者至十發十

中想二三百年中無一人矣何古今人之不相及至此

僧慧開弓

開勁弓者古多有之左右射者亦有之惟董僧慧能反手于背開五斛弓此自來所無僧慧丹陽人慷慨好讀書在南齊事晉安王子懋子懋舉兵不克死僧慧葬之悲慟而卒真可謂義勇士矣

紙鎧綿甲

紙鎧起于唐宣宗時河中節度使徐商劈紙爲之

勁矢不能入商有功五世孫也官至平章事太子
太保子彥若官亦如之有功仁恕之報也

綿甲以綿花七斤用布縫如夾襖兩臂過肩五寸
下長掩膝麤線逐行橫直縫緊入水浸透取起鋪
地用脚踹實以不胖脹爲度曬乾收用見雨不重
微黥不爛烏銃不能大傷紙甲用無性極柔之紙
加工鏈軟疊厚三寸方寸四釘如遇水雨浸濕銃
箭難透

甲冑密法

元太宗攻金懷孟人李威從軍患世之甲冑不堅
得其婦兄杜坤密法創蹄筋翎根別爲之太宗親
射不能入寵以金符威每戰先登不避矢石帝勞
之曰汝縱不自愛獨不爲甲冑惜乎謂諸將曰能
捍蔽爾爲國家立功名者威之甲也

廷杖

廷杖始于唐玄宗時御史蔣挺決杖朝堂張廷珪
執奏謂御史可殺不可辱人服其知體然本之又
起于隋文帝本記稱殿庭撻人此其徵也其後北

魏金元皆用之蓋以夷狄效中國而其本俗止有
斬殺原無此法

成化以前凡廷杖者不去衣用厚綿底衣重璫疊
靶示辱而已然猶臥床數月而後得愈正德初年
逆瑾用事惡廷臣始去衣遂有杖死者又成弘間
下詔獄惟叛逆妖言強盜奸生打着問喇虎殺人
打着問其餘常犯送錦衣鎮撫司問轉法司擬罪
中間情重始有來說之旨正德以後一槩打問無
復低昂矣

凡廷杖者俱豫知狀或自分疏入必不免得多服藥節嗇以待然間有死者惟廖恭敏莊諫上皇事久畱中不報矣以母憂領勘合入見景皇想舊事大怒命錦衣衛著實打八十送吏部貶驛丞此而不死真天祐也余同年有爲刑官者曰凡卒然與杖卽十下亦可死有意待杖至百亦難斃蓋心血不上冲故也然刑人者亦可念已

族刑

戰國而後有三族五族九族之刑國朝乃十族

鄒陽則謂荆軻湛七族不知如何算帳

木丸塞口

刑人者以木丸塞口始于武墨殺郝象賢象賢處
俊之孫墨銜怨因事誅之臨刑極罵用此法令離
磔其屍斲夷祖父棺塚人生不幸遇大難度不可
脫只默默以死何至憤極以自取酷烈且累及先
人骸骨耶讀方正學傳尤令人酸感

申文鬼殺

凡獄囚往往爲仇家賂獄吏或承上官風旨謬以

疾申不數日輒報死實殺之也成化弘治間曹子
文爲司獄吏主書寫申狀多矣一日與衆坐獄舍
忽旋風從外來文色變神亂張目若對語曰某人
某所命某人某所使非我罪也隨語隨困殆昇歸
家語不絕卒時謂衆鬼殺之也里中人親見皆能
言之

伏氣

魏宏字損之寶元中進士岳州司理叅軍嘗鞠獄
有囚閉口不食莫能詰宏乃引囚問曰吾以一物

塞若鼻能久不食乎囚懼遂承伏或問故宏曰彼必善伏氣若塞鼻則氣結死矣

革鞭夾錢

洪武末年湘陰縣丞劉英以生革爲鞭長三尺中夾銅錢撻人至皮肉皆裂嘗出行以巡檢未卽迎怒而撻其妻幾死上聞曰刑者不得已而用之故聖人常加欽恤惟恐濫及無辜英一縣丞耳酷虐乃至於此獨不聞劉寬蒲鞭之事哉且律載刑具明有定制乃棄不用而殘賊如是是廢吾法也

難論常律逮至戮于市

刑人而笑

寧國諸生周世祿有僕逃孝豐抵罪當贖金械送
本縣縣令欲斃之獄周代償而舍之其子希旦舉
進士爲蒲司理公訓之無深文無淫刑古者怒而
刑人今或笑而刑人怒則仇矣笑則樂仇之已甚
又可樂乎余儘見有刑人而笑者不獨有司此言
真刺骨可痛

鸚鵡墮地

陸綸字理之號南洋歸安人爲雲南太守一日之
野有鸚鵡向前哀鳴忽墮地則赫然死人也就而
視之已復爲鸚鵡呼老嫗問故家先殺人壓屍鸚
鵡籠下掘之如生亟召其子孫畀以殺人者四境
頌若神明

神斷

伍典爲柳州太守州民鍾鈕其叔自他所貽書鈕
携囊金市產鈕墮其計至中途叔與夥賊撲殺鈕
携其囊金去不可蹤跡妻訟之官且禱于神謂事

必下公始得決已而南寧道果以屬公檄至公得
鈕妻所上叔所貽書方思爲之計神忽見夢公因
策夢中語謂事常起于僧人因于府治白石山結
僧堂一區令方僧至者率舍其中各寫經凡幾已
而得一僧所寫經字與鍾妻所上書適類又因詰
其祝髮歲月正與殺鈕時合乃令鍾妻遣僕覘之
衆僧中果一人如鈕叔指以示卽公頃所詰問僧
也杖之吐實遂伏辜

陳琰字公信江都人貢生嘗按雲南每出入則凝

顧院東民家煙樓人莫知其故一日召其家長閉
諸後堂復遣人請其家文書匣檢閱有江西販客
路引乃呼家長出訊曰汝于竈所謀害江西客人
某因取其貨汝罪當死卽伏梟蓋屍座竈下出入
見煙樓中若有人手招以訴者衆驚以爲神後轉
陝西布政

余一龍婺源人爲江山令妻戴以刲股療姑卒繼
李人署令奄夕慮有乘間者潛出則邏卒醉獄戶
啓重囚將逸悉捕獲之郊行見婦哭夫於墓而不

哀有男子從召問若與彼何親曰婦夫友也廉其
隣里婦故淫夫暴死家無基功親收婦繫獄陰語
獄卒來視婦者告我前男子頻致其私獄卒以告
執訊之吐實邑稱神明

成宰長垣人舉人知睢州有殺人北城者街卒射
聲尋逐不得來自密察中有無良數輩忽馳騎迹
之一人臥褥下有血刀詰之以屠彘對笑曰屠彘
何避人爲而負刀以臥北城之事汝實爲之出不
意語塞服辜

顧承顯臨淮人太保尚書佐之孫爲虞城令鄉民
祝如川者頗居積一夕室有橐尸而喪其元家人
恟恟懼不測馳往熟視笑曰是不類生人手刃者
殆讐之爲挾睚眦而思覆其巢奴輩利汝財耳命
徧索諸野得新阡有遺首焉携至照合跡其人得
之立承曰公天神也

增官壽

彰德部中有大盜發覺林連士族數百家葛端肅
守禮爲司理讞鞠盡釋之後晉爲郎病甚夢帝謂

曰以彰德獄事增壽三紀後年七十四官太子少保左都卒爲郎時正年四十其數果符然則公不但增紀且增郎秩至八座矣

年少編發

兩廣擒賊率多斬首年少者亦斃于獄嘉靖三十二年總督應楨題請革扶道等皆年二十以下積惡未深乞編發湖江浙爲軍兵書聶貞襄公覆允活人陰德大矣遠矣

非法用刑

南齊時孔琇之爲吳令有十歲小兒偷刈隣家稻一束付獄案罪或諫之琇之曰小便爲盜長大何所不爲遂致於辟又有吉翰爲徐州刺史有死罪囚典籤意欲活之因輸入關齋呈事省訖語令且去明日更呈明旦典籤不敢復入呼之取昨呈來謂曰卿意欲宥此囚昨於齋中見其事亦欲活之但罪重不可全貸旣欲加恩卿便當代任其罪因命左右收典籤付獄殺之原此囚生命此皆出理法之外亂世之政不可爲訓乃吉翰收入循吏傳

而史贊琇之貞素之風不踐無義之地何居十歲
必無按罪之理典籤卽受賄欲活死囚進邪說何
至於殺旣可殺囚無活理此時君臣任意誅賞讀
書有名稱者尚然況武夫悍將哉大約惟勢家彊
宗任意恣行無敢犯而格者生人之酷寧獨編民
卒伍爲然可哀也已

門客義男

樊舉人者壽寧侯門下客也侯貴振天下樊負勢
結勳戚貴臣一切奏狀皆出其手然駕空亾事實

爲怨家所發事下刑部刑部郎中韓紹宗具知詰
主奏以實對曰樊舉人爲此于是攝樊舉人是時
樊匿壽寧侯所甚深乃百計出之下獄數日韓一
旦出門見地上一卷書取視則備書樊舉人罪狀
宜必置之死不死不可韓笑曰此樊舉人所自爲
書也詰之果服同僚咸謂此畏笞誣服耳何乃自
爲此韓呼樊舉人出使背誦其書背誦不訛一字
同僚驚問曰何乃自爲此對曰韓公者非可搖動
以勢斬生則必死今言死者左計也幾死我耳郎

中曰不然若罪不至死于是發戍遼寧侯雖心
惡之然無如之何又朝審囚徒中有亂義男婦者
坐死豕宰三原王公疑其太重以問主者不能對
韓前對曰義男犯其主與子犯其父同科有之乎
豕宰曰然韓曰固也然則亂義男婦者獨奈何弗
死也豕宰雅知公乃愈益重之後官副使歸苑洛
先生之父也

神示扼吭

馬應祥爲歙縣知縣郡有殺人者久不可得乃以

付公公先期齋戒禱越國汪公祠下曰神許我得
其情則雨是夜果雨翌日啓殯者棺事中諸人羅
跪乃一鼠自棺出鑽跪者一人承底尋忽不見公
念曰此神示也乃指其人曰殺人者汝其人色動
推究果服又郊外殺一人未絕公命移之縣大門
內許人縱觀之乃一人嗟歎其側者久之因扼其
吭遂絕是時公已教隸卒覘舉措矣覘者以告遂
執而抵于法蓋殺人利其財不絕恐或出語故復
來扼吭耳於是縣中稱神明

雪冤解獄

保定御史樂尚岳家居寢疾微得其奴妾姦狀與婦議欲撲殺之妾聞告奴奴厚賄一屠夜入殺御史夫婦而密灑血宿仇趙某之門及所經道上已乃佯驚大呼集衆跡之以血爲據樂無子奴妾卽訐趙坐大辟趙不服亟訴覆鞫時青陽章時鸞爲守一見疑之密詢奴所最厚者何人知爲屠也擒屠毋詢之立得實盡伏辜而御史之冤雪趙氏之獄解

馮小二

衡陽有少婦秦氏孀居有姿色姑欲嫁之不聽隣少年馮小二欲挑之以姑在不得間因計毒其姑佯爲助喪求與婦合婦大怒飛石中之因訐婦有所私爲姑所禁置就焉陷于辟有管思易者鄞人以恤刑至疑之夜夢老婦牽一馬泣訴曰馬實殺我非婦也徧求馬姓者不得視鄰右尺牘有馮小二忽悟曰是矣遽呼詢之立承婦遂得釋管後與尚書吳中爭獄不勝憤而卒

同宗二獄

豐城雷煥九者盜引爲窩法當死以冤走匿陶諧爲僉事曰第無恐果冤吾爲爾辯之煥九出公以雜諸隸中使羣盜認之不識明日復鞠之門外跂而矚者執以入盜叩頭曰渠實賄我建昌獄中使誣煥九煥九曰是同宗而有讐不意其爲此也立出煥九罪又同宗有二商自遠歸其一商過舊館止食竟不歸其家以先歸有謀訟之公推案館人不服見館所畜鸚鵡能言使持刀詰之鸚鵡言積

灰處啓灰得屍事遂白咸以爲神

斷朱英

尚書才寬爲西安府太守有治才過客失金于店
急白寬寬仰見飛鷹又有蜘蛛墜案曰店中必有
朱姓名英者爲盜執之果得金民皆神之謠曰才
寬斷朱英

鳴咽聲

鄒平王之士爲河間守民婦趙年二十六無故歿
訟于官王手其牒心動如聞有鳴咽聲廉之則姑

與少年通因逼趙不從斷指自誓寤之百方益罵
不從姑與少年擊之歿獄具稱神明

支解不孝子

唐剛保定府新城縣人告其子鉞不孝知縣吳瑗
令屠者支解鉞而燔之事聞以專殺慘虐瑗永遠

充軍

嘉靖十
九年事

二主事得罪

正德十三年下刑部主事鄭懋德林桂於錦衣衛
獄初刑部獄卒例有供食後移爲公使費而以囚

糧之贏者給之其弊已久會錦衣衛千戶王注與朱寧有連挾寧勢縱恣有瞽者善歌出入注家瞽者之兄與人鬪不勝注爲執鬪者綁掠之尋歿其家訟於刑部攝注就理寧庇之不發尚書張子麟郎中林文纘知其故置不問員外郎劉秉監代文纘署事再攝注又不發秉監卽據衆證成獄注聞而懼求救于寧曰我親戚誰不知乃待我言陰諷東廠發盜用囚糧事時懋德桂相繼提牢遂收繫獄且言諸堂官皆利其贏餘請窮治於是三法司

皆恐請東廠求解乃知意出於寧子麟及侍郎余
獻民胡歆造寧謝過寧佯不知三人者以秉監獨
禍尤之秉監稱病不出然寧必欲改獄秉監乃移
兵馬司覆勘指爲病歿注得改擬而歿者之家以
誣反坐注始請刑部見尚書侍郎皆與揖拜若賓
客禮及讞大理寺亦卽報允寧怒旣釋乃寢囚糧
事不治懋德桂本非其罪竟調爲州同知懋德臨
清州桂平度州

爭田

江西新建縣民毛鳳與同里民徐均仁爭田有舊
怨相訟久不決會朝廷遣南刑部侍郎金紳巡視
江西鳳乃嗾人誣均仁頻年在鄉劫殺拒捕且賂
其縣官妄報於紳及鎮守太監劉倜巡按御史段
正同儼三司及分巡等官遣百戶葉俊往捕之鳳
又賂以五十金密謀害均仁一家快私忿俊率兵
四十人鳳集二百七十餘人操火銃兵器以從圍
其家縱火焚之家屬死者二十三人杖死者五人
盡縛其未死者二十六人送于府轉達于巡按御

史皆信之獨按察司疑均仁等稱冤傷已重而無
賊其事必誣令府縣重鞠歿于獄者又十七人存
者徐細仔等三人令人訴之新巡按御史熊翀
奏其事 上以鳳等挾仇聚衆誣害一家人命命
刑部郎中奚昊錦衣千戶潘旺往會鎮巡覈勘得
實鳳等及俊坐凌遲歿仍籍俊家從者俱斬并責
問守巡等官境內有大獄久不究理令具聞處治
後俊歿于獄磔屍于市

寢大獄

李健齋名茂功文定公第四子也爲興化守少年羣不逞詢而過市市人或目之曰將曰虎曰地煞邑令喜事博名高知非公所欲也私告變臺使者黨數百人有異謀下令捕繫具獄臺使者檄公覆案公嘻曰屠沽兒醉飽得過惡足與治乎爲戍一人城旦春三人餘杖而釋之郡人大安同時吾兄汝器守建寧亦有此事活數百人旣歸卽生二子人謂有天道云

鬼撓搏額

神宗四十年南京御史王萬祚嚴州府人巡江至蘇州治豪家僕衆翕然歸之常熟有女巫妖淫惑衆土人擒以獻其罪甚確王覽牒忽大怒坐誣與杖各數十衆出不意又暑月斃者十餘人巫叩謝去王得意甚回京忽羣鬼撓之搏頰叫曰這是我不是這是我不是流血立死

雪白

諺曰雪白百姓謂人身上無一點暇類也此二字卽美王不能免惟雪無之故以爲言然古不云乎

一家之中大者可誅小者可殺此又何也百姓中
豈無隱過豈無無心之過以雪白二字概之不可
舍二字而苛求不可余所歷府縣正官甚多有一
最快事錄于後

里中有某者父子濟惡道路以目卽宦族方盛無
如之何有謝氏子家可千金少孤而佚誘之賭博
其祖尚在老矣且懦甚屢往尋歸歸而復去蓋某
別有誘之之術落其度中心已蕩不可制也歷兩
年其善田宅悉勒契質于大家矣謝七大憤欲告

于官某聞之笑曰此所蜻蜓搖石柱者余叔父謝
老之僭也來就謀畏之亦數數勸止卽余亦以爲
非敵時縣主爲楊楚璞應聘懷遠人癸未進士有
彊幹聲謝老奮曰楊公好官卽死且走一遭狀入
不省謝老大窘曰當死又何言衆押掄尤不可忍
踰跟而歸次日某方緩步街市將尋謝老所在搖
之尾而譴者數百人忽捕者至衆失色猶傲然望
其子以往旣至楊不與語某微覘氣色回顧同類
曰事敗矣楊治宅文書畢喝與大杖三十其子求

代并杖下獄而召謝老憫諭令歸俟晨畢待理蓋
不啻家人父子云衆聞之皆大驚呼楊青天蓋其
人縱惡久楊已刺知待時而發後竟伏辜里中清
泰者可十餘年此後陳筠塘太守尤快尤多然以
此府怨遭謗而楊之威德亦竟無人明之者湧錄
出俟後

湧幢小品目錄卷之十三

埋羹撤茶

中官祈哀

歲月正合

試諸生

杖知府

掩金寶

操縱蜀府

都郎中

清主事

林公四知

却餽負稅

騎士捧檄

習成節齋

止象鑿山

三速六字

投書

二于

叱金忘名

楊太守

四則

神識

王公政教

湯和俎豆

妄補棄官

藩國兩名臣

誓不畱食

麾兵抗席

夫婦却金

二則

立應軍需

補盜庫

救覆舟

雙魂

編差

苦里正

編役連拜

鰥巢

請旗牌

增筆畫

名宦

二則

生祀

蚤致仕

冢宰有媿

章童齊名

勸父隱居

忍詈

歸壽

安貧

藏賢書

知機掛冠

老萊衣

湧幢小品卷之十三

湖上朱國禎輯

埋羹撤茶

王璉昌邑人洪武初以儒士歷寧波知府堂僎用
魚肉命理之號埋羹太守有給事來謁具茶給事
爲客居間公大呼撤去給事慚而退又號撤茶太
守

中官祈哀

僉事陳諤字克忠恢諧正統初有中官阮巨隊奉

命來廣徵虎豹謬從阮飲求虎皮以歸明日草奏
言阮多用肥壯者宴客徒貢瘠虎使斃諸塗阮大
恐置酒謝謬酣謂阮曰聞子非閹者近娶妾然否
阮請閱諸室謬見羣雛知爲金珠佯問何物曰酒
也謬笑曰吾來正索此遂令人扛去阮哀祈得畱
其半廣人至今傳爲談謔謬永樂戊子舉人初爲
給事中奏事聲震朝宇上令餓數日奏對如前
上曰是天生也呼爲大聲秀才忤上命爲坎瘞之
謫瘞者云吾今夕乃爲大甕所苦請其故則罵曰

叱嗟汝不知耶 朝廷瘞人當如甕可令速死瘞
者從之遂得屈伸凡七日不死釋還故官諱性剛
直屢仆屢起歷卿寺僉事知縣長史同知以壽終
歲月正合

洪武間黃巖縣承方冠之後頑敝殊甚有瞽林心
月者年八十餘寓西橋善易數預知吉凶嘗爲人
言後此五十年有周令者來民始安果有周旭鑑
者貴溪人以學行三楊薦知縣事凡九年縣以大
治父老憶其歲月正合群訴請留卽陞台州通判

仍縣事卽陞知台州府事又加右叅政掌府事前
後凡三十餘年台人賴之黃巖遂爲善邑

試諸生

韓公雍巡撫江西每對生員稱說詩書時江西科
目方盛生員私相謂曰巡撫千字文秀才耳安得
稱說詩書公聞之命提學送諸生來考以律呂調
陽爲論閏餘成歲爲策諸生皆不能詳公曰我輩
做秀才時讀了百家姓便讀千字文諸生如何連
千字文也不知士皆愧服

杖知府

朱公英總督兩廣繼韓襄毅之後一切以簡靜治之民以大和又薦陳白沙皆賢者事其杖廣州知府林橙亦奇橙莆田人天順丁未進士知廣州性豪侈暑日易紗衣數襲烹茗確不再用以紗一幅封其口用畢卽棄去燭大如椽使童子執之動卽與杖閤訟以已意出入縱吏爲奸英杖之啓其裙褲皆紗製英歎曰民力竭矣卽逐去民皆稱快

掩金寶

榆林雙山堡之東有所謂柳樹會者舊柳州也土人于瑾耕地得金磚金甲諸物所值萬餘金鄰人訟之鎮督姚公鎮令僉憲姚文清鞠之問其所自瑾云其下隧道數曲有巨室三楹東西皆金銀堆積中則金甲冑數十又有金耳環如今製而長者數甕所積以千萬計蓋西夏金元故物也姚僉憲請公差官勘實聞于朝而發之以寶庫藏則百萬之積可具鎔曰若是則人將謂我輩先有所獲何以自明且榆林鎮所少豈獨此哉于瑾一農夫

耳而天賜之不可奪也乃斥訟者以金歸瑾仍厚封其地以絕後患後至者議卽故地發取旋思其言而止

操縱蜀府

羅通以御史按蜀蜀王富甲諸國出入僭用乘輿儀從通心欲檢制之一日王過御史臺公突使人收王所僭鹵簿蜀王氣沮藩臬俱來見問狀且曰聞報王罪且不測今且奈何通曰誠然公等試思之詰旦復來俱曰無策通曰易耳宜密語王但謂

黃屋左纛故玄元皇帝廟中器今復還之耳玄元
皇帝唐玄宗幸蜀建祀老子者也從之事乃得解
王亦逆自欽通始至蜀中士大夫易通少年至是
始驚服

都郎中

戶部郎中劉爾牧號堯麓東平州人尚書源清之
子也進士在部八年方大司徒鈍器重舉奏必以
屬同列不堪目爲都郎中卒坐杖歸里尚書公尚
無恙

清主事

張隨字子貞山西芮城人永樂丁酉解元授戶部主事極清苦宣廟微行至其家見其躬汲水內子舂米甚嘉歎後坐法上曰此清主事也勿問改工部以疾歸三十餘年茅屋村居不異寒士或曰張巡之後巡芮城人有墓在焉有東張南張二村史曰巡南陽人蓋自芮而遷死節後土人憐之具衣冠以葬

林公四知

閩林氏祖父孫三世五尚書最後南工書仲山公
煙予同官南京恂恂篤實人公之曾祖父名鏐永
樂辛丑進士撫州知府有善政吳康齋大書金井
玉壺冰五字褒之入覲乞致仕歸其友戴弘齡素
方嚴慎許可稱公有四知僉曰楊震故事乎戴曰
乃公饒爲之更有進者知縣知州知府又知足也
公爲上猶令山東寧海州守俱乞歸展墓見許
祖制之優卹外官乃爾

却餽負稅

丘司寇櫛本清方之士然其胸次淺隘好爲名高
不近人情其在省中時湖廣撫臣方廉餽之五金
疏發其事方以此去人頗不直之遂謝病歸里其
後居鄉力却上官餽遺而多負國稅有縣令惡其
矯積所却餽遺數百十金請於兩臺以抵其逋稅
丘大慚方在告時有薦之江陵者江陵曰此君怪
行非經德也終不肯起江陵沒召爲侍郎往籍江
陵大宗伯于公慎行深規之未幾丘之子雲舉中
進士官亦不達

騎士捧檄

吾師劉晉川以少宰起少司空理河漕事方憇于門二騎士捧檄至謂其田父也揖曰爲通主君公諾而入肅衣冠出見之騎士驚伏罪笑曰無傷也若固不識耳此等事古有行之者又見于公亦自可喜

習成節齋

梁司徒材爲廣東左轄旦夕皆飯堂上脩以青菜或冬瓜蘿蔔惟一味比擢副都御史巡撫江右薦

紳皆餞諸大觀橋解衣盡歡痛飲大嚼始知其節
嗇乃習慣成自然爾視所服圓領用浙蕉極下者
衷服布素澣補惟雨裙鮮潔

止象鑿山

世廟末年滇有都御史某請行職象之法于北邊
錢塘陳敬亭善時爲右轄極言象產炎徼不耐西
北苦寒事得寢陳居滇久昆明之傍曰榜山山陽
有田五千頃地高苦旱陳視白石崖有泉在上游
可引漑而爲橫山所隔議鑿山通渠衆咸難之陳

力任矢衆禱天久之未就衆嫉之陳引去行有日
矣橫山水洞忽報開通咸驚爲神助云感之立祠
至今享有永利屢薦未能用在家優游二十年令
終輿論崇重與松江莫中江如忠金昌袁裕春洪
愈竝稱云

三速六字

郭青螺子章與夏仁吾良心辛未科同年同爲左
方伯郭得閩夏得江西郭問夏曰何以從政曰予
有三速速收速給批速放夏問于郭曰予有六字

一錠收原封放二公兼用所長皆有清聲皆開府
郭泰和人夏廣德人

投書

胡澧字伯鍾三水縣人弘治癸丑進士彊力有幹
爲松番副使討賊有功胡端敏薦之忤柄臣歸吳
清惠又薦之不起後霍文敏爲少宰熟知其才且
善射精韜鈴值大同兵變薦赴京擬僉都御史任
西北有投書者發之中四字曰何如如何求其人
不得命未下而卒

二于

于達真字子冲歷城人丁丑進士以澤州知州爲
兵部員外郎兵部未滿歲陞山西僉事飭兵昌平
神宗閱壽工昌平孔道以才選擇三年中車駕四
出應之沛然後官至叅政歿人咸惜之初第以詩
文名諸生時與于文定公俱爲我郡吳竣伯所拔
稱二于又善騎射總兵董一元兄弟較獵數數勝
之天與之年必爲名制閭

叱金忘名

屈西溪直華陰人官至左副都御史先爲我浙按察使歸安知縣某被告發科歛萬金按之知縣懷白金來餽求解叱出之治益急會遷河南乃止及公治漕事則知縣爲御史起復赴京過淮上修謁執屬官禮甚恭公喜畱宴譚及浙偶忘某爲御史也因言生平未嘗苟取如浙屬一知縣犯賊餽金求解叱出未竟及今耿耿不知其人何如也御史色沮愈恭公怪之及別去諦思卽其人大悔已無及某入臺以劉瑾黨誣公遂罷

楊太守

楊繼宗爲刑部主事河間府獲強盜遣里甲張文郭禮解送京師中途遇夜盜自釋刑具而逃張語郭曰人言縱盜者罪與盜同予二人俱死不若畱一人汝母老寡兄弟汝可爲解人予爲盜可全汝母子之命郭感謝張以刑具自服到司公疑其言動非盜審之得實二人遂俱得活其真盜後亦爲人所擒

公在天順中陞嘉興太守成化元年丁憂五年服

闕復補嘉興先後滿九載今人皆知公之德政而不知其先後兩任也

守嘉禾久時清北都等鄉禾每莖離根二節節間又生三莖秀三穗或生四五莖四五穗者有之竟畝計之三穗者一二百二穗者數千百在在皆滿府經歷司蓮缸內栽禾二木亦如野外生莖穗公自爲文記之滿九年考以素苦風痺自治行訪醫送者傾郡內外不得行願乞一物以示永永解青紗永與之百姓藏之縣樞寘三賢祠右後卽家起

浙江按察使至僉都御史撫雲南公字承芳山西
陽城人爲國朝良刺史第一又有黃懋者元氏
人亦滿九年有惠政曾拔呂文懿于諸生陞福建
布政還卒嘉興遂葬于邑北板坊子中領浙鄉試
墓數廢數復子孫尚存

楊公陞浙按察使以憂去民挽之不能得旣行十
餘日相驚謂公奪情復任懼呼載道迎候者填溢
城門月餘方息近年我浙實廉使子偃棄官去自
杭至平望挽留者塞塗無慮數十萬人則余所親

見者

神識

范楨會稽人守淮安景王出藩大盜謀劫王布黨起天津至鄱陽分徒五百人往來遊奕一日晚衙罷門卒報有貴客入僦潘氏園寓拏者曰有傳牌乎曰否命誨之報曰從者衆矣而更出入心疑爲盜陰選健卒數十易衣帽如庄農曰若往視其徒入肆者陽與飲飲中挑與鬪相搏繫以來而戒曰慎勿言捕賊也卒旣散去公命與謁客西門過街

肆搏者前訴卽收之比反得十七人陽怒罵曰王
舟方至官司不暇食暇問汝鬪乎叱令就繫入夜
傳令儆備而令隸飽食以需漏下三十刻出諸囚
于庭厲聲訊曰汝輩謂官府當出迎王而欲乘空
虛爲亂吾久知之徒送死耳咸叩頭伏曰奴輩當
死往捕賊首已遁所畱孥妓也于是令飛騎馳報
徐揚諸將吏而斃十七人于杖餘賊散潰鄉宦某
者淫暴擅殺大爲里中患海夷之亂築郭絕衢道
自固府判出經其郭閉勿令過判還以訴公公怒

命墮焉無何其徒殺邳州三郵以賊級報驗得之
遂以兵圍其第繫徒三百餘人併發其所爲諸奸
利事訊之皆款伏某知不可解陰行刺偵知之不
得發則賂于朝得復起脫身亟行赴官會爲臺糾
奉詔逮問而歸獄詞于四郡公焚香誓神引囚七
百鞠之得實以報某竟獄死民家子徐栢及婚而
失之父訴府公曰臨婚當不遠遊是爲人殺耶父
曰兒有力人不能殺也久之莫決一夕秉燭坐有
濡衣者臂兩甕僂而趨默詫曰噫是栢魂也而繫

斃水死耳明日問左右曰何池沼最深者吾欲暫
遊對曰某寺遂輿以往指池曰徐栢屍在是網之
不得將還忽泡起如沸復于下獲焉召其父視之
栢也然莫知誰殺公念栢有力殺栢者當勅一日
忽下令曰今亂初已吾欲簡健者爲快手選竟視
一人反襖脫而觀之血漬焉呵曰汝何殺人曰前
陣上斃耳解其裹血漬霜纈公曰倭在夏秋豈須
襖殺徐栢者汝也遂具服云以某童子故執童子
至曰初意汝戲言也果殺之乎一時稱爲神識少

嘗讀書道觀數怪見同學者死焉公翫習無懼色
其膽決蓋天性也卒歲有降紫姑神者諸孫就問
壽以詩呈公詩有半醉逢司馬句公笑曰吾今死
矣半文八十加一吾壽數也醉者酉卒丁酉年也
馬屬午在午日乎果以六月午日歿

王公政教

王銳永平府遷安縣人進士景泰間爲彰德知府
銳長身修髯顧眄生威有權術尚嚴政治察郡中
吏民賢不肖賦則獄訟皆籍識自聽其政吏亡得

爲姦出必鑰關泥之民終歲不得與吏交一言縣
吏以賄聞者案之卽令去他事不中程者笞督令
改案深究事情吏民畏之如神每行郡城中民皆
閉戶亡敢立道旁藏遠雞犬恐有聲銳時策馬過
視馬耳不左右顧令民臨道屋俱作修廊簷外浚
深溝而潦得洩中道隆立令水赴溝中行委巷口
樹柵門有鑰甲夜卽闔門釘板仰臥柵門外柝竟
夜鳴姦人莫敢入郡地也尤畱心學校凡朔望謁
先師廟已坐明倫堂聽諸生說經發疑無異諸生

皆居學宮籌識姓名政少暇令隸持數籌造明倫
堂諸生持籌來自臨試或背誦書或作義其他出
及不衣冠居者受笞當是時黷序間讀書聲洋洋
盈耳丁祭陳鐘鼓鳴絃管陞降揖遜甚都恭政姚
龍行部至府待見之出而歎曰此雖國學亦無以
加也

陽和俎豆

呂大川字中源浙新昌人成化甲辰進士守惠州
有善政征劇賊張權大川隨軍督餉察脅從誅誤

者釋之所至召耆老諭以禮義禍福莫不感動番
馬張詔曰呂惠州可謂霜雪之陽和戎馬之俎豆
也竟卒于官

妄捕棄官

妖賊王子龍已于贛州龍南縣當陣殺死報功敘
賞矣後惠州通判署和平縣事復稱子龍未死今
在民家白所司務獲賴撫移書令殺後捕者滅口
太守孫光啓不從拂衣歸孫嘉興人正直忠厚示
于昭慶寺一識面真有過人者未幾起福建叅政

卒官

藩國兩名臣

胡興祁門人進士授三河知縣 文皇帝封趙王
擇輔以興爲長史漢庶人將反密使至趙王大驚
將執而奏之興曰彼舉事有日矣何暇奏乎萬一
事洩是趣之叛一夕盡殲之漢平趙王讓還護衛
兵 宣廟亦聞斬使事曰吾叔非懷二心者趙遂
得免興恢博多智畧歷輔簡王惠王及王八子侃
侃師道自任

趙準藁城人長身美髯性剛毅方嚴終日無惰容
不輕言笑年二十餘始讀書時有敏少年日記數
千言趙先生耻居其下日所誦書必與之埒日不
足竟夜讀忘寢舉順天鄉試爲學官景泰間遷趙
府紀善好諫諍常思死節王令諸郡王皆受經爲
講說甚詳懇門弟子常數十年獲嚴諸生步立皆
有則尤重背誦以身先之無倦諸生侍側凜凜時
太守有十子五子驕縱甚雖守無如之何一日聞
趙先生嚴自領其子來且遺一朴廣二寸厚半寸

書其面曰專治五子毋及餘生諸子一望見卽凜然皆折節受學守親致于衙置上座亦不讓崔仲鳧之父少時出門下歿祀于家

誓不畱食

顧昌字德輝長洲人鄉薦爲思恩府同知清介絕俗人不敢干未嘗受一疏之餽晚年家居詣人家誓不畱食雖遠去數十里寧飢而歸文章簡潔似其爲人

麾兵抗席

太倉周雲川怡貳泉州值倭變署事調兵食有方
士皆懷之新守秦姓者至年少任意不時給兵大
譁公出麾之立散遂罷守以公爲代公受業于王
大司馬思質弁州方幼與公爲爾汝交狎撫靡不
至思質忽延公爲師抗席正顏指摘文字亡所避
弁州小怠卽攝齊請去皇恐謝罪乃已後補永昌
不復出

夫婦却金

南樂魏節齋怡以貢爲鞏昌通判行部秦州賦戶

投金于几覺而察之逸去乃付州庫夫人楊氏東
歸復過其地州吏取以獻夫人又謝却之生三子
長允貞丁丑進士官侍郎允中丙子解元庚辰進
士吏部主事允孚甲戌進士刑部郎中侍郎子廣
徵甲辰進士官宮寮世著清節云

侍郎撫山西日廩止受八分京朝官以使事至者
亦如之或嫌其薄曰計肉食可五豆必食前方丈
而後快耶一僉事行部至澤州州守爲吾友許繩
齋維新事之無失禮而僉事少年舉解首素豪奢

自用撻其承事人許怒停傳給凡三日僉事窘馳去中文侍郎云州乏供具僅殺一母雞而食批云食雞有何不足而尚以爲悞露筆作罪案耶僉事大愧引疾去

立應軍需

張愷鄞縣人宣德三年以監生爲江陵知縣時征交趾大軍過總督日晡立取火爐及架數百愷卽命木工以方漆卓鋸半脚鑿其中以鐵錫實之又取馬槽千餘卽取針工各戶婦人以綿布縫成槽

槽口綴以繩用木椿張其四角飼馬食便收卷前路足用遂以爲法後周文襄薦爲工部主事督運大得其力

補盜庫

嘉靖乙丑盜劫長壽縣知縣劉熒清吏也挈印踰牆大呼逐寇庫中一空邑中人相率補足竟以嘔血死爲神民憐而祠之祈禱必應

救覆舟

李一寧字應坤東莞人正德丁卯鄉薦爲蘇州教

授清苦端方後知懷寧縣豈弟愛民卒于官無以爲殮先是泊江干遇一覆舟心動令人鑿之得一婦抱嬰孩猶活詢知長沙人隨舅宦遊一家淹沒扳掛已二日矣爲買舟歸其鄉

雙槐

黃瑜字廷美香山人有學行景泰丙子舉人歷長樂知縣有惠政以勁直棄官手植槐二構亭吟嘯其中自稱雙槐老人曰子孫更植其一則吾志畢矣蓋希蹤三槐也作雙槐歲抄

編差

洪範金谿人字邦正進士弘治末爲嘉興令初至
不事事吏卒皆侮易之及編差糧長太守憂其不
任諷諭之洪歸集里書庭中焚香與約吏卒笑狎
如初洪大怒杖而懸諸樹中令曰多用人廢時日
且牟利每區只里老二人敢妄舉者卽代役毋貸
庭中肅然皆以實舉盡日而畢上諸府府驚曰此
重事須幾更日月乃辦何草草乃爾範曰姑覆之
卽辭還府召應役者問人人稱允守歎曰神哉令

乎吾眼幾瞎在官鋤彊扶弱廉靜寡慾以比楊繼
宗云

苦里正

韓倫字秉燹苑洛先生之叔知武清縣忤梁昉罷
歸杜門不出縣尹以禮致之不得于堂叔繼宗應
里正尹故苦以爲公必可致公曰彼苦里正于我
何與竟不往尹後愧悔言之分守車平章平章曰
尹誤矣致賢豈以威力哉率尹踵門請數次乃見
尹誠俗人然悔而請教于上官則俗而不失爲雅

若在今則禍且不測矣

編役連拜

長洲知縣郭波福建人與致仕尚書劉纓有小隙
編其家糧長七名復以謝罪爲辭造其廬連拜二
十餘拜旣出門號于衆曰我欲拜死老賊耳劉年
八十餘不勝憊憤而卒其孫不能承役逃移四方
家立破矣

鰥巢

陳善住廣東欽州人洪武中以貢歷任知縣官居

三十餘年皆有能聲妻子不入官自號其居曰鰥
巢

請旗牌

陳岷麓爲德清令甚有聲蓋亦快士也後爲御史
監遼東軍救朝鮮發憤請旗牌督戰此提督事如
何可行部執不與快快遂卒于軍贈光祿少卿廕

其子

陳名效
四川人

增筆畫

王受洛川人以監生爲東阿丞邑民王虎當受重

役賂吏改其名曰田虎兩人爭不決公曰此必王虎也筆畫可增請府籍質之果王虎也遂伏罪

名宦

平度州名宦故祀漢臣王成判官陳有勲見之嘻曰此非偽增戶口者乎草牒請釐革未及舉以憂歸有勲副都克宅之子太宰有年之兄也志節爲時所重

婁璿東陽人成化五年以監生知順德縣性剛果好摧折權勢刻廉自喜聞貪者輒厲聲罵雖上官

不避人多嫉之。遣子就外傳令自執。蓋曰皂隸役于官非汝役也。竟坐誣去。後祀名宦。萬曆十二年所司檄削士論惜之。夫削名宦非撫按卽提學也。當查其人實之。

生祀

地方官生祠自上達下。往往有之。惟學院絕無。蓋教以嚴爲主。不欲苟悅于人情也。惟南京有陳督學一祠。余友劉幼安見之。必嘻曰。提學乃有生祠。又譚有秉寬政者。嘻曰。秀才爲汝造生祠矣。此言

甚有意習俗相沿寧獨提學爲然

蚤致仕

常熟丁南湖名奉正德戊辰進士南司封郎中年
三十九致仕謂古今賢士終此官者得二人焉宋
則庶汝言明則莊定山景且云同入泮者二十五
人三進士同鄉舉者六人五進士皆先死而已以
年少獨存又多子孫快然自幸亦達人也致公以
母徐太安人喪服闋致仕累薦不起時同鄉陸太
宰完爲政將用之固辭不赴太宰其母舅也臨卒

作入山待盡詩別六孫別鰥居小樓數詩皆有超然之識先是國朝戊辰科本縣中進士者止洪武二十一年施顯正統十二年吳淳官皆御史皆有文學皆不壽至公亦入御史選以母老辭改南吏部早乞休所著有南湖畱稿而壽亦甚永要見天有定數人固能畱之矣又築假山于家名曰代勝自爲之記

冢宰有媿

鞠珍字廷玉臨朐人成化中鄉薦奉親至孝不信

浮屠母卒躬負土成墳後選南樂主簿常祿之外
一無濡染請部考績珍乞歸田曰老不能任職餘
祿足以養身復何求焉家宰王公歎曰吾有愧乎
爾矣歸家杜門不出尹嘗署其家以遠役珍裹糧
以往尹聞之驚曰何乃爾遽令罷之非公事不謁
人稱有澹臺之風焉

章童齋名

章楓山先生同時有童品者字廷式號慎齋與先
生齊名成化丙午舉南試丙辰始登第爲兵部主

事僅兩考引年致仕家居十九年以讀書喪明不自炫而卒著書甚多其學問行誼不後楓山而有傳有不傳則後死者之責也

勸父隱居

嘉興包馮隱居不仕父畝池陽太守欲棄官歸意未決馮奉書重緘無他言惟左太冲招隱詩而已池陽遂歸歸後學神仙無所遇孫樗芳副使代有冠冕

忍言

曹憲副時中華亭人隣有悍生修其先世怨以聖
書公名于牛後向其僮加鞭因極口肆詈欲以激
公怒僮歸以告徐曰人詈我而若述之是重詈我
也速往謝無勞齒頰生不能難于是修尺一若爲
候者而中實痛詆令人直入跪上之公不發曰休
矣待吾僮來旣而從者至命火燔之曰知若主于
我無好言也生愧而止年九十卒卒時有紫雲自
天而降繞尸人以爲仙去

歸壽

吳蔚全椒縣人舉進士爲臨淮簿時青苗法行口
語藉藉蔚注錯得宜民以不擾積朝請大夫知廣
德彭池三州所至興學勸士性尤夷澹一夕夢人
示四大字曰龜者必良覺而誦曰龜者歸也龜壽
而藏神告我矣卽謝病歸終日宴坐凡十七年卒
年八十四

安貧

顧璘字英玉璘之從弟也官副使以伉直歸貧甚
昕夕不繼晏如也嘗曰貧賄請囑與武斷鄉曲雖

石差等然皆非知耻畏義者之所爲

藏賢書

貢生陳職號鐵峰東阿人性淳古愛賢書藏之不復出一日客有泊舟河上陳詣之語及江南多士欣然往不復與家人別追之至淮而返

知機掛冠

永新縣蕭公樟以舉人署江山學諭凡十年登進士官刑部主事大禮被杖幾死告改南京刑部執法甚肅鐵漢屢忤要人陞曲靖知府公知機械所

自掛冠不赴

老萊永

葉孟禎惠安人永樂丁酉舉人司訓高州念親老
陳情乞歸省隨改授泉州朝夕子舍備盡孝養久
之遷順義教諭陞陵源令棄官歸稱爲廉吏邑有
陳御史者橫甚鄉里苦之公上書陳狀御史坐削
籍惠安人皆德之莆田林太史文有送歸省詩後
四句云江燕迎人語山雲傍馬飛到家歡侍口應
著老萊永

恥掃門

程學庸孝感人伊川先生八世孫也九歲善屬文
鄉三老劉公騎而過之揚鞭曰孺子行矣爲拱立
道左不移足劉愧下揖趨而別焉爲諸生力學手
兩程夫子遺編服膺勿失嘗言兩夫子產黃陂前
川有望魯臺邑東有讀書臺百世之下聞風興起
而後裔顧屑越之乎一日坐磯石咏陽明白沙詩
數章豁然開悟題其壁間有涓涓銀海陶塵慮皎
皎明月照匠心之句宗人坐事走白監司約公往

日吾不欲屈膝貴人前往者皆溺死邑人士以公
前知云與江陵弟子同籍偕計入都衆皆修謁公
獨否或言相國雅相慕也公以正對掃丞相府門
者何人而子爲我願之耶授榮澤知縣有惠政

拔髮

杜傑黃岡人父子鳴爲僉事傑少時日者言當以
刀筆得官怒而自拔其髮誓以儒顯有朱廷相官
知縣女字里中豪朱貧且死豪停婚僉事公歎曰
爲令而貧君子也焉有君子而其女患無婿者爲

公委禽夜夢朱戟冠衣緋來謝君誼甚高得請於
帝美報矣復夢神贈以言有天上日初長人間春
正好之句是歲戊午公弱冠遂舉于鄉主司初擲
不錄詰朝卷自展案上如是再異而錄之衆甚傳
其故以爲天所以旌德也父客死滇扶服萬里將
柩而歸值暑灑瀕大如馬瞿唐不可下公撫棺而
哭頭搶地顙天驚濤忽減須臾舟行抵岸長年三
老相顧且駭且喜徵孝子精誠昭格不及此授長
寧知縣採木萬山中一切馭以信義夷酋咸樂爲

盡力水涸木不行露禱于天比曉諸溪澗不雨而
溢石激之跳沫丈許木沿流無所阻觀者謹爲神
尋告歸卒

抗中璫

吳宗堯歛人爲益都令稅璫陳增至橫甚誣奏福
山令下詔獄餘皆震恐往往長跼如屬吏吏白公
公叱曰鬚眉男子乃爲闕屈膝耶不往見而之登
州謁海防使者德王使人諭增此非他今比也增
陽諾公還王使兩璫來翼公輿而入增無可如何

下堂迎卒成賓主之禮而退然耻爲公所亢銜之
淡公過金嶺鎮鎮驛長金子登擁騶從如上官公
訶之已盛供張復麾不納孟坵山有鉛鑛子登說
增此可鬻金幸以相付月得金若干爲壽增遂檄
之公數詰責子登遂行讒構增逮諸富民誣之盜
鑛三日至五百人公憤甚疏其狀增反誣遂被逮
初公見增惡已書而藏之笥曰吾儕七尺軀戴天
履地託足聖門豈可浮慕空談自類穿窬際會當
幾則張膽明目爲民請命爲主達聰爲縉紳作氣

身外榮瘁都付浮雲郡守胡士鰲甫上官五日以
疏示之士鰲曰君有二親不虞貽其憂乎曰有兄
弟在曰聞君貧曰可以筆耕略無戚容士鰲卜之
靈棋曰金精欲起賴得元士左手抑之乃獲止息
其詩曰疾風如勁草板蕩識忠臣藉此匡扶力乾
坤物又新公曰金精所謂六庚白虎客星害氣也
左手抑之桎梏之象扶乾坤者誰乎下鎮撫司送
刑部益都民欲殺增者洵洵增恐徙徐州俄夢牛
在山上寤曰其出牢之微乎會增以所括時俸等

貲數十萬進而陽乞貸公儀郎鮑應鰲偕其友六
人謁四明相曰南康守星子令微惠得正襟牖下
益都何獨不然四明秘啓入卽日釋公歸方劾增
尋上書乞放還山皆不報父母念公俾公婦來視
至淮聞逮止不進公使吏翟士朴奉書還而奄迹
得之士朴藏書壁隙令奄舍兒馳去奄考朴囚所
有舍之乃得免公歸家尋卒人皆惜之